



**REPUBLIKA E KOSOVËS**  
REPUBLIKA KOSOVA – REPUBLIC OF KOSOVO

**GJYKATA THEMELORE GJAKOVË - DEGA E GJYKATËS RAHOVEC**

Numri i lëndës: 2024:224392

Datë: 30.08.2024

Numri i dokumentit: 06105574

PPP.nr.54/24

GJYKATA THEMELORE NË GJAKOVË – DEGA NË RAHOVEC, Departamenti i Përgjithshëm-Divizioni Civil, gjyqtari Avni Berisha, me bashkëpunëtoreshen profesionale Shpresa Haxhijaha Rahmani, në lëndën përmbarese të kreditorëve A.G nga fshati Bratotin, komuna e Rahovecit, A.M dhe A1.M, që të dy nga fshati Vrajakë, komuna e Rahovecit, të cilët i përfaqëson i autorizuari Av. S.M nga Prizreni, kundër debitorit Komuna e Rahovecit, Drejtoria Komunale e Arsimit, të cilën e përfaqëson i autorizuari Zyrtari Ligjor, V.G, duke vendosur sipas propozimit të debitorit të ushtruar kundër urdhërit të përmbaresit privat R.H nga Prizreni P.nr.1282/24, të datës 22.07.2024, më 30.08.2024, merr këtë:

**A K T V E N D I M**

- I. REFUZOHET në tërësi si i pabazuar propozimi i debitorit Komuna e Rahovecit, Drejtoria Komunale e Arsimit, i paraqitur kundër urdhërit të përmbaresit privat R.H nga Prizreni, P.nr.1282/24, të datës 22.07.2024, me të cilin është caktuar përmbarimi sipas propozimit të kreditorëve A.G nga fshati Bratotin, komuna e Rahovecit, A.M dhe A1.M, që të dy nga fshati Vrajakë, komuna e Rahovecit, në bazë të dokumentit përmbarimorë, Aktgjykimit i Gjykatës Themelore në Gjakovë dega në Rahovec C.nr.1123/23 i datës 24.05.2024.
- II. MBETET NË FUQI urdhëri i përmbaresit privat R.H nga Prizreni P.nr.1282/24, të datës 22.07.2024.

**A r s y e t i m**

Në bazë të propozimit të kreditorëve A.G nga fshati Bratotin, komuna e Rahovecit, A.M dhe A1.M, që të dy nga fshati Vrajakë, komuna e Rahovecit, përmbaresi privat R.H nga Prizreni, ka lejuar përmbarimin sipas urdhrit P.nr.1282/24, të datës 22.07.2024, në bazë të dokumentit

përmbarrimor, C.nr.1123/23 i datës 24.05.2024, i plotfuqishëm me datë 19.06.2024, i ekzekutueshëm nga data 27.06.2024, kundër debitorit Komuna e Rahovecit, Drejtoria Komunale e Arsimit, për shkak të detyrimit në të holla në emër të kompensimit të shpenzimeve të procedurës kontestimore, në shumën e përgjithshme prej 228.00 euro.

Kundër urdhrin me të cilin është caktuar përmbarrimi, debitori Komuna e Rahovecit - Drejtoria Komunale e Arsimit, ka paraqitur prapësim me të cilin ka kundërshtuar urdhrin për caktimin e përmbarrimit, pasi që sipas tij, debitori Komuna e Rahovecit - Drejtoria Komunale e Arsimit, nuk është e detyruar të kryej detyrimin, por për këtë obligim duhet të obligohet Ministria e Arsimit, Shkencës dhe Teknologjisë. Duke shtuar se propozimi për përmbarrim është në kundërshtim me dispozitat e nenit 9 të LPP-së, ndërsa duke u bazuar në Udhëzuesin e Gjykatës Supreme të datës 04.02.202, e njëjta ka vlerësuar se: “ *Përmbarrimi i dokumenteve përmbarrimore nga ana e gjykatës dhe kërkesat materiale është në pajtim me parimin e mbrojtjes së debitorit që nënkupton se procedura e përmbarrimit duhet të realizohet me sa më pak shpenzime në mënyrë që të mos ngarkohet pozita e debitorit*”. Andaj ka kërkuar nga gjykata që të aprovoj prapësimin e debitorëve dhe të shfuqizoi urdhrin përmbarrimor.

Kreditorët brenda afatit ligjor kanë ushtruar përgjigje në prapësim, duke theksuar se prapësimi i debitorit është i pa bazë, me arsyetimin se kundërshtimi i debitorit nuk mbështetet në asnjë bazë ligjore. Duke shtuar se dokumenti përmbarrues është i plotfuqishëm dhe i përmbarrueshëm konform nenit 177 par.1 të LPP-së. Gjykatës i ka propozuar që prapësimin ta refuzojë si të pa bazuar.

Gjykata pas shqyrtimit të propozimit të kreditorëve, urdhrin për lejimin e përmbarrimit, prapësimin të debitorit, përgjigjes në prapësim të kreditorëve, shkresave të lëndës, ka ardhur në përfundim se prapësimi i debitorit është i pabazuar.

Sipas dispozitave ligjore të Ligjit Nr.04/L-139 (i publikuar në Gazetën zyrtare të Republikës së Kosovës Nr.3 të dt.31.01.2013, më tej LPP) në nenin 21 përcaktohen bazat juridike për caktimin e përmbarrimit, “*Organi përmbarrues e cakton, përkatësisht e zbaton përmbarrimin vetëm në bazë të dokumentit përmbarrues (titulus executionis) dhe dokumentit të besueshëm, po qe se me këtë ligj nuk është parashikuar diçka tjetër*”, ndërsa me nenin 22 par.1 nënpar.1.1 përcaktohet se “*1. Dokumente përmbarruese janë: 1.1“vendimi përmbarrues i Gjykatës dhe ujdia (pajtimi) gjyqësore përmbarruese*”.

Gjykata me analizimin dhe shikimin e dokumenti përmbarrues – Aktgjykimi C.nr.1123/23 i datës 24.05.2024, vërtetoi faktin se debitori ka qenë i obliguar për shkak të detyrimit në të holla emër të shpenzimeve të procedurës kontestimore, t’ia paguaj shumë e përgjithshme prej 228.00 euro, të gjitha me kamatë ligjore prej 8% në afat prej 15 dite pas plotfuqishmërisë së këtij aktgjykimi. Debitori me asnjë prove nuk arriti të vërtetoj faktin se ka kryer pagesën për këtë shumë. Gjykata po ashtu ka vërtetuar faktin se dokumenti përmbarrimor – Aktgjykimi C.nr.1123/23 i datës 24.05.2024, i dhënë në procedurë gjyqësore është nxjerrë nga organi kompetent, ka marrë formën e prerë me datë 19.06.2024, si dhe i njëjti është i ekzekutueshëm nga data 27.06.2024,. Sipas LPP-së nenit 27 par.1 përcaktohet se “*Dokumenti përmbarrimor është i përshtatshëm për*

*përmbarrim në qoftë se në të është treguar kreditori dhe debitori, si dhe objekti, mjetet, shuma dhe koha e përmbushjes së detyrimit". Nga kjo rezulton se vendimi në fjalë është titull përmbarrimor për shkak se e ka të përcaktuar kreditorët dhe debitorin, kohën e përmbushjes së detyrimit, si dhe shumën e përmbushjes, andaj si i tillë është i përshtatshme për përmbarrim, dhe gjykata vendosi si në dispozitiv të këtij aktvendimi duke e lënë në fuqi urdhërin përmbarrimor P.nr.1282/24, të datës 22.07.2024.*

Gjykata analizoi kundërshtimet e debitorit lidhur me urdhërit për lejimin e përmbarrimit P.nr.1282/24, të datës 22.07.2024, mirëpo këto pretendime i vlerësoi si të pabazuar, sepse gjykata në procedurën përmbarrimore nuk lëshohet në ligjshmërinë materiale të dokumentit përmbarrues, në bazë të të cilit kërkohet përmbarrimi. Gjykata në procedurën përmbarrimore kujdeset se a është bërë propozimi për përmbarrim dhe a është lejuar përmbarrimi në bazë të dokumentit përmbarrues siç kërkohet me dispozitat ligjore në fuqi. Në rastin konkret përmbarrimi është lejuar në bazë dokumenti përmbarrimor Aktgjykim, C.nr.1123/23 i datës 24.05.2024, të Gjykatës Themelore në Gjakovë, dega në Rahovec, i plotfuqishëm me datë 19.06.2024, i ekzekutueshëm nga data 27.06.2024, ndërsa kreditorët propozimin për përmbarrim e kanë parashtruar me datë 22.07.2024, brenda afatit sipas të cilit mund kërkohet përmbarrimi.

Nga të lartcekurat, duke u mbështetur në dispozitat e nenit 22, 23, 24 par.1 dhe 27 lidhur me nenin 73, 77 par.1 dhe 5 dhe nenit 290 të Ligjit mbi Procedurën Përmbarrimore, vendosi si në dispozitiv të këtij aktvendimi.

GJYKATA THEMELORE GJAKOVË -DEGA NË RAHOVEC  
Departamenti i Përgjithshëm-Divizioni Civil,  
PPP.nr.54/24, dt. 30.08.2024

B. Profesionale  
Shpresa Haxhijaha Rahmani

Gjyqtari  
Avni Berisha

**KËSHILLË JURIDIKE:** Kundër këtij aktvendimi pala e pa kënaqur ka të drejtë ankese, brenda afatit prej 7 (shtatë) ditëve, pas ditës së pranimit të tij, Gjykatës së Apelit në Prishtinë, nëpërmes kësaj Gjykate Themelore.